

## Aña di Kua Famia?

Famianan, e blòkinan ku ta forma e stuktura di nos komunidad, sin duda tin mester di atenshon, hopi atenshon. Un aña dediká pa studia i fortifiká e famia por ta di gran benefisio, BASTA KU hòmbenan i muhénan, mayornan i yunan ta evaluá nan propio situashon familiar i ta apliká prinsipionan sano na nan famia

Ma maske nos ta aploudí e echu ku e famia ta haña atenshon durante e aña aki, nos ta atmití ku nos tin un problema sumamente grandi ku e konsepto di famia ku Nashonnan Uní ta promové i ke pa nos aseptá.

Sekretario General Boutros Boutros Ghali, a deklará na e Asemblea General di Nashonnan Uní: "No tin un solo definishon di famia. No tin un solo modelo." Si esei ta e konsepto ku e dirigente máksimo di Nashonnan Uní ta promové, anto Nashonnan Uní mes ta kulpabel di kontribuí na e debilitashon di e famia!

Dikon Ghali, un hòMBER eduká, ta plei kèns pa ku un definishon di algun ku asta un mucha por deskribí? Pasobra Nashonnan Uní ke legitimá matrimonio immoral; nan ke pa nos aseptá e konsepto ku dos homoseksual òf lèsbian tambe por forma un famia. Na lugá di rekonosé ku e konsepto aki ta destruktivo pa ku e famia manera Dios a kre'é, Nashonnan Uní ta boga pa nos aseptá "formanan nobo di bida familiar pa kumpli ku e reto di mundu moderno."

Si nos ta aseptá Boutros Boutros Ghali su idea ku ningun definishon di famia ta eksistí, i pues kualke areglo ta aseptabel, nos ta aseptá un konsepto desastroso pa ku e famia. Aseptando matrimonio di dos pèrsona di e mèsun sekso no solamente ta debilitá nos konsepto di famia; e tambe ta habri porta pa tur klase di immoralidat i káos. Djis para pensa un ratu. Si ningun definishon di famia ta eksistí, i dos hòMBER homoseksual por ser konsiderá un famia, anto pakiku no por aseptá tres, kuater, òf sinku hòMBER homoseksual ku ta biba huntu komo un famia? Si kualke areglo ta aseptabel pa forma un famia, anto e pregunta ta unda nos por hala e liña? Ken i kuantu hende ta forma un famia di bèrdat? Dos hòMBER ku siku muhé tambe por ta un famia? I dikon un tim profeshonal di futbol no por ta konsiderá un famia? Ontvanger lo pèrmití nan tur haña un rebaho ora nan ta paga nan belasting pasobra nan tur ta forma un famia?

Si nos no sa kiku un famia ta (segun Nashonnan Uní ta pretendé), anto ta impusibel pa sa si bo tin un famia. Un famia por ta kiku ku ta, òf e por ta nèt nada. Ta algu sumamente peligroso i serio ora nos ta kuminsá hunga ku e definishon di un famia.

Pa Nashonnan Uní proklamá 1994 komo "Aña di Famia" sin sa kiku un famia ta, ta sumamente apsurdo. Nos ta konkluí ku nan a proklamá 1994 komo "aña di ken sa kiku!" En realidat, no ta ku Nashonnan Uní no por saka nan sòm kiku un famia ta...ta ke nan no ke komprendé!

Algun hende ta surgerí ku un bon definishon di famia ta kualke grupo di hende ku ta stima otro. Pues, kualke pèrsona ku ta bisa ku e ta stima un otro pèrsona ta forma un famia ku ne. Ridíkulo! Si esei ta un famia, kiku ta sosodé ku e famia si nan ta bringa ku otro? Kiku ta sosodé si nan no ta stima otro mas? Segun e definishon ei, nan no ta un famia mas.

Kiku ta un famia? Un famia ta originá ku un matrimonio monógamo heteroseksual i ta konsistí di un grupo di pèrsona ku pa medio di matrimonio, nasementu, òf adopshon tin lasonan familiar ku otro. "Un hòMBER lo bandoná su tata i su mama i keda uní ku su esposa. I nan lo ta un solo karni" (Génesis 2:24). Dios Su plan ta heteroseksual. El a uní un HOMBER i un MUHE ku otro; Adam i Eva, no Adam i Ivan, ni tampoko Ada i Eva. Dios ta demandá monogamia: 1 hòMBER i 1 muhé...ningun baisait ta pèrmití, ni poligamia. Matrimonio tambe ta un eksigensia; bibamentu ta kondená pa Palabra di Dios.

E énfasis riba famia e aña aki ta na su lugá. E stuktura familiar na nos islanan ta benefisiá di charlanan i informashon sano. Ma nos mester ta kouteloso pa no guli e as, anto muchu lat ta ripará e anzué. Nos mester sigui nenga redondamente e hipokresia i lokura di Nashonnan Uní.